

PEMEGANG lesen KL Madani yang berminat untuk berniaga di bazar Ramadan boleh mengemukakan kepada DBKL melalui saluran pendaftaran sedia ada.

STRUKTUR SEMULA BAZAR RAMADAN

Jumlah lesen, kadar sewa ke atas operator bakal dikaji

Oleh Muhammad Yusri Muzamir
yusri.mu-
zamir@bh.com.my

Kuala Lumpur

Dewan Bandaraya Kuala Lumpur (DBKL) sedang melakukan penstrukturan semula bagi operasi perniagaan bazar Ramadan di kawasan seliaan pihak berkuasa tempatan (PBT) itu.

Menteri di Jabatan Perdana Menteri (Wilayah Persekutuan), Dr Zaliha Mustafa, berkata ia bertujuan memastikan operasi perniagaan sepanjang tempoh berkenaan dapat berlangsung secara lebih tersusun.

Beliau berkata, penstrukturan semula itu memba-

bitkan kajian ke atas jumlah lesen yang akan dikeluarkan serta kadar sewaan bakal dikenakan ke atas operator di bazar Ramadan.

Selain itu katanya, pemegang lesen KL Madani yang berminat untuk berniaga di bazar Ramadan boleh mengemukakan kepada DBKL melalui saluran pendaftaran sedia ada.

"Penstrukturan semula (operasi bazar Ramadan) dibuat memandangkan terdapat beberapa isu berbangkit.

"Justeru, kita cuba melaksanakan yang terbaik untuk memastikan perniagaan dapat berjalan seperti biasa tetapi dengan lebih tersusun," katanya pada sesi lisan di

Dewan Rakyat semalam.

Beliau menjawab soalan tambahan **Roslan Hashim (PN-Kulim Bandar Baharu)** mengenai pembabitan pemegang lesen KL Madani dalam operasi bazar Ramadan.

**“
Penstrukturan
semula dibuat
memandangkan
terdapat beberapa
isu berbangkit
Dr Zaliha**

Sementara itu, Dr Zaliha berkata, pemegang lesen KL Prihatin perlu menjalankan perniagaan secara sendiri dan tidak boleh menggajikan, terutama pekerja asing untuk menjaja bagi pihaknya.

Katanya, ini selari Undang-Undang Kecil Pelesenan Penjaja (Kuala Lumpur) 2016, menyatakan lesen penjaja dikeluarkan secara individu dan pemegangnya

bertanggungjawab penuh ke atas operasi perniagaan, selain menyerahkan hak, memajak atau menyewa lesen kepada pihak lain adalah dilarang.

"DBKL memantau ke atas semua penjaja Lesen Sementara KL Madani sebanyak dua kali seminggu. Jika berlaku salah guna atau pelanggaran syarat lesen, DBKL akan mengeluarkan Notis Kampaun hingga melaksanakan proses pembatalan lesen.

"Bagi memudahkan pemantauan, DBKL akan memperkenalkan penggunaan khemah, baju, apron dan topi seragam kepada penjaja bertempoh atau di tepi jalan ini," katanya menjawab soalan tambahan Fong Kui Lun (PH-Bukit Bintang).